



FLETORJA ZYRTARE

E

REPUBLIKËS SË SHQIPËRISË

Botim i Qendrës së Publikimeve Zyrtare

Nr. 3

2001

Shkurt

P Ë R M B A J T J A

Ligj nr.8707 datë 1.12.2000	Për privatizimin e shoqërisë anonime “Servcom”...	87
Ligj nr.8735 datë 1.2.2001	Për një shtesë në ligjin nr.8662, datë 18.9.2000 “Për trajtimin si titull ekzekutiv të faturës së konsumit të energjisë elektrike”.....	88
Vendim i KM nr.73, datë 15.2.2001	Për kriteret dhe masën e trajtimit të veçantë të punonjësve që kanë punuar në minierë, nëntokë.....	88

LIGJ
Nr. 8707, datë 1.12.2000

PËR PRIVATIZIMIN E SHOQËRISË ANONIME “SERVCOM”

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË
V E N D O S I:

Neni 1

Shoqëria anonime “Servcom” i nënshtrohet privatizimit.

Neni 2

Fillimi i procesit të privatizimit dhe i ristrukturimit, forma e privatizimit dhe struktura e formulës së privatizimit për shoqërinë anonime “Servcom” përcaktohen me vendim të Këshillit të Ministrave.

Neni 3

Të ardhurat që do të përfitohen nga privatizimi i “Servcom” sh.a. ndahen si vijon:

1. Punonjës të “Servcom” sh.a. quhen punonjësit e sotëm dhe ata që dolën të tepërt me vendimin nr.422, datë 9.7.1998 të Këshillit të Ministrave.
2. Punonjësve të “Servcom” sh.a. që do të dalin të papunë gjatë procesit të privatizimit dhe të ristrukturimit, u jepet një shpërblim i barabartë me pagesën e një viti dhe u paguhen kontributet e papaguara të sigurimeve shoqërore.
3. Pjesa tjetër e të ardhurave të derdhet në Buxhetin e Shtetit.

Neni 4

Ngarkohet Ministria e Ekonomisë Publike dhe Privatizimit të ndjekë dhe të organizojë punën për zbatimin e këtij ligji.

Neni 5

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.2894, datë 9.2.2001 të Presidentit të Republikës së Shqipërisë,
Rexhep Meidani

LIGJ
Nr. 8735, datë 1.2.2001

**PËR NJË SHITESË NË LIGJIN NR.8662, DATË 18.9.2000 “PËR TRAJTIMIN SI TITULL
EKZEKUTIV TË FATURËS SË KONSUMIT TË ENERGJISË ELEKTRIKE”**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË
V E N D O S I:

Neni 1

Në nenin 1 të ligjit nr.8862, datë 18.9.2000 “Për trajtimin si titull ekzekutiv të faturës së konsumit të energjisë elektrike”, pas fjalëve “është titull ekzekutiv” shtohen fjalët “dhe ngarkohen zyrat e përmbarimit me ekzekutimin e tyre.”

Neni 2

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.2896, datë 9.2.2001 të Presidentit të Republikës së Shqipërisë, Rexhep Meidani

VENDIM
Nr. 73, datë 15.2.2001

**PËR KRITERET DHE MASËN E TRAJTIMIT TË VEÇANTË TË PUNONJËSVE QË KANË
PUNUAR NË MINIERË, NËNTOKË**

Në mbështetje të nenit 100 të Kushtetutës dhe të ligjit nr. 8685, datë 9.11.2000 “Për një trajtim të veçantë të punonjësve, që kanë punuar në miniera, në nëntokë”, me propozimin e Zëvendëskryeministrit dhe Ministër i Punës dhe Çështjeve Sociale dhe Ministrit të Ekonomisë Publike dhe Privatizimit, Këshilli i Ministrave

V E N D O S I:

1. Punonjësit që kanë punuar në miniera në nëntokë, në rastet kur për llogaritjen e bazës së vlerësuar mungojnë dokumentet, niveli minimal i përfitimit të jetë 5 148 lekë.
2. Punonjësit, të cilët përfitojnë trajtim të veçantë, duhet të dorëzojnë këto dokumente:
 - a) kërkesën për përfitim;
 - b) certifikatën e lindjes, me fotografi;
 - c) certifikatën e gjendjes familjare;
 - ç) librezën e punës;
 - d) vërtetimin për periudhën e sigurimit dhe për periudhën që ka punuar nëntokë;
 - dh) deklaratën personale, nëse ushtron veprimtari ekonomike ose jo;

e) vërtetimin nga zyra e tatim-taksave, për regjistrimin ose jo, si person fizik apo juridik, të tatueshëm;

ë) vërtetimin nga zyra e punës, nëse është i regjistruar ose jo, si i papunë ose përfiton pagesë papunësie;

f) vërtetimin e bazës së vlerësuar.

3. Drejtoria e Përgjithshme e Minierave, në Ministrinë e Ekonomisë Publike dhe Privatizimit, paraqet, pranë Institutit të Sigurimeve Shoqërore, listën e minierave, që nuk ushtrojnë veprimtari dhe që nuk kanë administratë pranë tyre. Kjo Drejtori paraqet, një herë në muaj, pranë Institutit të Sigurimeve Shoqërore edhe të dhëna për numrin e përfituesve, në shkallë vendi.

4. Administratat e minierave të dërgojnë pranë agjencive të sigurimeve shoqërore, listëpagesat, për të cilat janë derdhur kontributet për sigurimet shoqërore dhe listëpagesat për periudhat, për të cilat janë debitore ndaj sigurimeve shoqërore.

5. Personat, që plotësojnë kushtet për përfitimin e trajtimit të veçantë, paraqiten pranë agjencive të sigurimeve shoqërore të vendbanimit apo të vendit të fundit të punës së tyre, ku do të pajisen me dy kopje të kërkesës për përfitim.

6. Personat të paraqesin, në agjencitë e sigurimeve shoqërore, dokumentet e parashikuara në shkronjat “a”, “b”, “c”, “dh”, “e” dhe “ë”, të pikës 2 të këtij vendimi.

7. Personat të paraqesin, në administratën e minierës ku ka qenë vendi i fundit i punës, një kopje të kërkesës për përfitim. Administrata, pasi e shqyrton dokumentacionin për periudhën e sigurimit, periudhën e punës nëntokë dhe bazën e vlerësuar mbi të ardhurat e realizuara nga puna të personit e interesuar, i plotëson ato dhe i dërgon në Drejtorinë e Përgjithshme të Minierave, në Ministrinë e Ekonomisë Publike dhe Privatizimit.

8. Në rastet kur miniera, ku personi ka patur vendin e fundit të punës, është mbyllur, kërkesa për përfitim paraqitet në Drejtorinë e Përgjithshme të Arkivës së Shtetit, apo në drejtoritë e arkivës në rreth, ku është dokumentacioni i kësaj miniere. Këto drejtori, pasi e shqyrtojnë dokumentacionin për periudhën e sigurimit, periudhën e punës nëntokë dhe bazën e vlerësuar mbi të ardhurat e realizuara nga puna e personit të interesuar, i plotësojnë ato dhe i dërgojnë në Drejtorinë e Përgjithshme të Minierave, në Ministrinë e Ekonomisë Publike dhe Privatizimit.

9. Drejtoria e Përgjithshme e Minierave në Ministrinë e Ekonomisë Publike dhe Privatizimit, pasi verifikon dokumentacionin e paraqitur nga administrata e minierës apo nga drejtoritë e arkivave të shtetit, dërgon në drejtorinë rajonale të sigurimeve shoqërore, ku është paraqitur kërkesa e personit për përfitim, këto dokumente:

a) vërtetimin për periudhën e sigurimit dhe për periudhën e punuar nëntokë;

b) vërtetimin e bazës së vlerësuar mbi të ardhurat e realizuara nga puna.

10. Dokumentacioni, që autorizon dhe vërteton pagesën e përfitimeve, në zbatim të ligjit nr.8685, datë 9.11.2000, përcaktohet nga Instituti i Sigurimeve Shoqërore, i cili, për këtë punë, përfiton një komision, në masën prej 1.5 për qind të shumës së përcaktuar për pagimin e përfitimeve.

11. Pas paraqitjes së listës së punonjësve, nga Ministria e Ekonomisë Publike dhe Privatizimit dhe Ministria e Punës dhe Çështjeve Sociale, Këshilli i Ministrave përcakton fondin e nevojshëm për përballimin e trajtimit të veçantë.

12. Ngarkohen Ministria e Ekonomisë Publike dhe Privatizimit, Ministria e Punës dhe Çështjeve Sociale, Ministria e Financave dhe Instituti i Sigurimeve Shoqërore për zbatimin e këtij vendimi.

Ky vendim hyn në fuqi 15 ditë pas botimit në Fletoren Zyrtare.

KRYEMINISTRI
Ilir Meta

Fletorja Zyrtare gjendet në:

1. Në çdo njësi postare të çdo qyteti;
2. Pranë Qendrës së Publikimeve Zyrtare,
Rr. Qemal Stafa, pranë ndërtesës së Prokurorisë së Përgjithshme.

U dorëzua për shtyp më 17.2.2001
Doli nga shtypi më 19.2.2001

Tirazhi: 4000 copë

Formati: 60x88/8

Shtypshkronja e Qendrës së Publikimeve Zyrtare

Çmimi: 100 lekë